



Belanjawan 2024 turut fokus perkasa ekonomi digital - MCMC

Oleh Muhaamad Hafis Nawawi - Oktober 14, 2023 @ 1:26pm

mhafis@mediaprima.com.my

KUALA LUMPUR: Suruhanjaya Komunikasi dan Multimedia Malaysia (MCMC) melihat Belanjawan 2024 mampu memacu negara ke arah menjadi sebuah negara berinovasi, berteknologi tinggi dan memperkasa ekonomi digital.

Pengerusi MCMC, Tan Sri Mohamad Salim Fateh Din, berkata, peruntukan kepada Pusat Ekonomi Digital (PEDi) bukan sahaja akan dapat membantu memperkasa usahawan untuk meningkatkan tahap sosio-ekonomi mereka bahkan juga dapat menyumbang kepada pertumbuhan ekonomi digital negara.

Beliau berkata, peruntukan sebanyak RM25 juta bagi memperkasa PEDi di setiap Dewan Undangan Negeri (DUN) diyakini dapat meningkatkan penjanaan pendapatan dan mencipta lebih banyak peluang pekerjaan.

"Ketika ini, terdapat 911 kemudahan PEDi yang beroperasi sebagai satu platform sehenti untuk berkhidmat kepada masyarakat.

"Selain itu, MCMC turut menyokong kerajaan dalam memperkasa fungsi Pusat Respons Scam Kebangsaan (NSRC) yang menambah peruntukan kepada RM20 juta bagi meningkatkan lagi fungsi NSRC membanteras jenayah penipuan dalam talian atau scam," katanya dalam kenyataan hari ini.

Mohamad Salim berkata, MCMC juga sentiasa mempergiatkan usaha meningkatkan kesedaran berhubung jenayah scam.

"Sehubungan itu, pembabitan MCMC dalam NSRC adalah penting bagi membangunkan masyarakat berpengetahuan dalam dunia siber.

"MCMC turut mengalui-alukan peruntukan besar berjumlah RM100 juta daripada pihak kerajaan, ke arah memupuk penggunaan pendigitalan dalam kalangan 20,000 Perusahaan Mikro, Kecil dan Sederhana (PMKS)," katanya.

Beliau berkata, usaha ini menandakan satu langkah ke arah meningkatkan kualiti perniagaan untuk setiap PMKS, ketika mereka memperluaskan perniagaan ke arah model perniagaan digital.

"MCMC akan terus komited untuk memastikan agenda pertumbuhan ekonomi digital negara dapat memperkasa rakyat ke arah literasi digital yang tinggi menjadi antara fokus utama selaku pengawal selia komunikasi dan multimedia negara," katanya.